

# 楚国文公南山书院碑记

谦系由来旧矣。自蹄封乌程欧馀山，缘以族姓。汉时封摇，析两派，一千乘、一渤海。未几，千乘绝，惟渤海裔独传，由汉历晋魏，莫识其地。梁时景达显长沙，五传至宏文阁学士询，询五传至吉州刺史琮，琮八传至彪与彤与万，一分粤东，一分常溪、蜀江口，派别支分，散难悉纪。惟万令安福，谦所自出也。万十五传至安时始家浏阳马渡，即文公高祖也。安时生岳麓书院讲书、赠中奉大夫、岭北湖南道宣慰使护军、追封冀国公新，新生潭州学录、赠昭文馆大学士资善大夫上护军、追封冀郡公逢泰，逢泰生道州教授大学上舍生、累赠学士、追封渤海郡侯、加赠荣禄大夫上柱国、追封冀国公龙生，龙生生翰林学士、承旨光禄大夫、知制诰、兼修国史、追封楚国公、谥文讳元，谦十四代祖也。忆得姓数千年来，显名望秩，不可胜数，即文章事业，卓然为世冠而并荣。曾祖、祖考三代者，自宋庐陵文忠公后，孰有如公者乎。公在元，上佐太平，下泽海宇，前倡绝学，后启未来，功期綦钜矣。当时天子隆酬功之典故，敕命屡降，赐祭田、建书院、世荫袭而祀重春秋，由明迄今，

犹蒙休无穷。公后皆只传至四代孙，继宗绵衍于邑西蛇头，世守马渡祀事。我朝追念名贤，大锡育后之仁，康熙甲午恩赐，谦次男启达复备荫员，谦率男等思修庐墓，重新书院于南山旧址，以永春秋祭祀。缘长男启通补邑弟子员未久而没，事不果。庚子夏偕男启达等即故地经营，造学舍三间，前后二进，辟左右为讲堂、寝室，又置书院旁田土、池沼共六十余亩，并良材坚甃，倾费千金，皆自己出，未尝派及族众，诸贤贵记之详矣。谦尝念为人，子孙不能躬自振拔显于朝而望于众，以光前人大烈，而乃举坠修废，区区称胜于松楸柏板清酒骅牡之间，行自愧矣。第恢宏先泽，条析渊源，事不可诬，因谨按家乘暨省郡邑志所载，聊述梗概，勒之贞珉以垂不朽，冀公灵其默鉴焉。

嗣孙胜谦识